

In Grischun per ina Grischuna a Berna?

Reaziuns d'exponents da la pps grischuna

DA FLURIN ANDRY / ANR

■ **Dapi che cussegliera federala Eveline Widmer-Schlumpf ha dà part sia demissiun examinescha la pps grischuna tgi che pudess candidar per il Grischun. Heinz Brand ni dementescha ni conferma ina candidatura.** «Ord vista da la pps grischuna avain nus fatg quint suenter ils 18 d'october, cur che la pps ha survegnì uschè bleras vuschs, che *Eveline Widmer-Schlumpf* sa retiria», di *Andrea Davaz* (pps, Maiavilla) che preside-scha la partida chantunala, «igl exista uss per nossa partida la schanza da pudair returnar puspè a la concordanza.» Quai saja fitg impurtant en vista als gronds problems en Europa ed en Svizra, «questa demissiun calma las tensiuns politicas actualas extremamain. La pps ha ditg ch'ella veglia sorprender responsabladad sch'ella vegnia integrada, la partida è qua u là era pronta per il cumpromiss sch'ins po uschia schliar problems.»

Nums datti pir ils 13 da november

Tgi da la pps chantunala che vegn a candidar sco cusseglier u cussegliera federala na di Davaz betg: «Fin ils 13 da november avain nus temp per evaluar sche nus avain in candidat u ina candidata per ir a Berna. Quella giada communigain nus alura sche nus avain chattà insatgi», declera il president ch'è, sco ch'el di, fitg fortunà da la situaziun actuala. In dals candidats pussaivels è il cusseglier naziunal *Heinz Brand*. «Igl è fitg difficil da giuditgar las schanzas da Brand, ma sch'el ve-



Cusseglier naziunal Heinz Brand ni conferma ni dementescha ina candidatura per il cussegl federal.

KEYSTONE

gniss elegì daventass *Valérie Favre Accola* sia successura», menziuna il president da la pps grischuna, «cun Brand, Martullo-Blocher e Favre Accola fissan

alura trais represchentants dal Grischun activs en la politica naziunala. Quai fissan natiralmain ina situaziun fitg giavischabla per noss chantun, jau sai

però che quest è uss propi fitg speculativ.»

«Constellaziun per Heinz fitg difficila»

La situaziun da Heinz Brand per daventar successur d'Eveline Widmer-Schlumpf fissa fitg difficila, manegia *Valérie Favre Accola*: «La probabilitad ch'in cusseglier federal grischun suonda ad ina cussegliera federala dal medem chantun è pitschna, era sche sias cumpetenzas èn incontestadas suror ils cunfins da las partidas.» Els da la pps chantunala audian savens ch'ins lavuria gugent cun Brand, ch'el saja conciliant e constructiv, di Accola che maina il secretariat da la pps grischuna, «quai s'ha mussà er en las cumissiuns federalas. Sia finamira principala è da chattar soluziuns.» Ins stoppia perquai spetgar ils 13 da november, renda attent Favre Accola.

Fin uss n'è Brand anc betg segir

I saja baingea ina grond'onur da vegnir numnà «il topfavorit» tar la tscherna da la nova u dal nov commember dal cussegl federal, di Heinz Brand sez, «fin uss però na sun jau anc gnanc nominà. La pps grischuna vegn a trair quella decisiun pir pli tard.» Perquai è, sco ch'el cuntinua, tut anc intschert. «Sche jau fissa pront da candidar stoss jau anc studegiar, dapi mesemna avain nus ina nova situaziun. Quella è ussa l'emprim d'analisar e giuditgar», explitgescha il cusseglier naziunal Brand, «perquai na poss jau actualmain betg confermar u dementir che jau vegnia a candidar per il cussegl federal.»

Pps svizra cun divers candidats pussaivels

(sda/anr) La pps vul il sez ch'è vegnì liber en il cussegl federal. Tgi che candidescha ils 9 da december nun è anc enconuscent. I dat anc adina blers candidats pussaivels. Tar ils topfavorits tutga il cusseglier naziunal grischun Heinz Brand. L'anteriur schef da la polizia d'esters chantunala vala sco expert per la migraziun. Savens vegn numnà er il cusseglier dals chantuns *Hannes Germann* da Schaffusa sco candidat per il cussegl federal. Areguard ils contracts bilaterals ha el in zic in'otra opiniun che la partida sezza. Cusseglier naziunal *Hansjörg Knecht* da l'Argovia avess a l'avis dal president da la pps *Toni Brunner* las premissas necessarias per daventar cusseglier federal. Cusseglier naziunal *Guy Parmelin* dal chantun Vad e *Thomas de Courten* da Basilea avessan era interess da daventar candidats per il cussegl federal. Quai vala era per il cusseglier naziunal genevrin *Yves Nidegger*, il Schaffusian *Thomas Hurter* ed il Bernais *Albert Rösti*. Ditg da betg avair interess han il schef da la fraziun *Adrian Amstutz*, l'anteriur cusseglier naziunal *Peter Spuhler*, il cusseglier dals chantuns *Roland Eberle* e *Toni Brunner*. Ils 20 da november decida la fraziun da la pps tgi ch'ella nominescha. Tenor Brunner èsi pussaivel che la pps nominescha duas persunas.